

四庫全書

集部

欽定四庫全書

集部

兩宋名賢小集卷二百七十五
七十六

詳校官中書臣孫 澂

助教臣常備覆勘

總校官編修臣王燕緒

校對官學正臣周 鉉

謄錄監生臣王登賢

欽定四庫全書

兩宋名賢小集卷二百七十

宋 陳思 編

元 陳世隆 補

白石道人詩

姜夔字堯章鄱陽人工聲律慶元三年進樂書乞正雅樂詔令太常與議嫉之不果行居苕溪與白石洞天為鄰轉庵潘檉號之曰白石道人又畀以詩云世

間官職似擣菹采到枯松亦大夫白石道人新拜號
斷無繳駁任稱呼時愛與黃景說齊名景說亦號白
石人稱雙白石

五言古詩

奉別沔鄂親友

以長歌意無極好
為老夫聽為韻

滔滔沔鄂留有醜三宿桑持鉢了白日事賤丸蛄蜣舍
當去石友煙席凌江湘為君試歌商歌短意則長

佳人魯山下

謂楊大
昌正之

日弄清漢波促絃調寶瑟哀思感

人多咬哇秦缶擊冷落郢容歌知音良不易如此祭者何

英英白龍孫

鄭仁舉
次臯

眉目古人氣拮据營數椽下簾草

生砌文章作逕庭功用見造次無庸垂罄嗟遺安鹿門

意

詩人辛國士

辛泌
克清

句法似阿駒別墅滄浪曲綠陰禽鳥

呼頗參金粟眼漸造文字無兒輩例學語屋壁祝

又作
呼

蒲盧

山陰千載人揮洒照八極只今定武刻猶滯龍虎筆單

侯出機杼

單侯諱炳文

豈是劍舞得餘波入竹石絕嘆咄咄

逼

異時之果君在涅守白顛黃鐘欠牛鐸淋漓弔遺稿有

子殊可人

蔡迨堅吾子字武伯

特未見此老客來請論文但道曲

肱好

中郎遊千霜曲高復誰為龐翁趣無絃鄭伯功斲鼻春

風桃花溪寒淥繞蒼翠何當從兩君放浪計幽事

宦達羞故妻貧賤厭丘嫂上書雲雨迴還舍笋蕨老江
臯鋤帶經決計恨不早士無五羖皮沒世抱枯槁

伐木響虛牝我願友褐夫九闕呀虎豹何時內高祛黃
鵠渺雲樹鷓鴣澹煙蕪倚杖得清賞洗心觀本初
孤鴻度關山風霜摧翅翎影低白雲暮哀噉那忍聽士
生有如此儲粟不滿瓶著書窮愁濱可續離騷經

赤松圖

山東隆準公未語心已解按劍堂下人成事汝應退非

無帶礪約正爾有恩害平生三寸舌松間漱寒澗

雪中訪石湖

雪斫如玉城偏師敢輕犯黃蘆陣野鷺我自將十萬三
載渠未降北面石湖范先生霸越手定自一笑粲

虞美人草

夜闌浩歌起玉帳生悲風江東可千里棄妾蓬蒿中化
石那解語作草猶可舞陌上望騅來翻愁不相顧

花藏寺雲海亭望具區

寺為張循
王功德院

茫茫復茫茫中有山蒼蒼大哉夫差國坐占天一方夫
差醉蓮宮巨浪搖不醒越師何從來碎我玉萬頃年年
亭上秋一笛千古愁誰能知許又作
幾事飛下雙白鷗

夏日寄朴翁時在靈隱

風吹松樹枝懷吾松間友雲從北山來令吾屢回首山
雲夜夜起山雨侵人衣遙知竹窻裏自吟新雨詩

春日書懷

九真何蒼蒼乃在清淡尾衡茆依草木念遠獨伯姊春

來衆芳滋春去衆芳萎兄弟各天涯啼鳩見料理漢江
出巨魚風雷入驅使安得挾吾輶西征二千里

春雲驛路暗遊子眇歸程永懷故山下風雨悲松庭翁
仲不解語幽鳥時時鳴人家插垂柳客裏又清明

垂楊大別寺春草郎官湖家巷有石友合并不待呼瘦
藤倚花樹花片藉玉壺老鄭談絕妙辛楊句敷腴平生
子姚子貌古心甚儒時邀野僧語閒與琴工俱酒闌興
未了左轉城南隅大江圍楚碧煙水入玄虛留落不自

恨唯嗟故人踈一月三見夢夢中相與娛日日潮風起

悵望武昌

一作魚陵

武昌十萬家落日紫煙低亭亭頭陁塔高處白鳥棲白鳥忽飛去春山空四圍南樓有佳人再召且再辭閉門課文史櫻物深天機斯人不可致白鳥會來歸

箜篌引

箜篌且勿彈老大不可聽河邊風浪起亦作箜篌聲古人抱恨死今人抱恨生南鄰賣妻者秋夜難為情長安

買歌舞半是良家婦主人雖愛憐賤妾那久住綠貧來
賣身不緣觸夫怒日日登高樓悵望宮南樹

賦千巖曲水

紅雨洒溪流下瀨仍小駐魚隊獵殘香故故作吞吐老
子把一盞微風忽吹去

李陵臺

李陵歸不得高築望鄉臺長安一萬里鴻雁隔年回望
望雖不見時時一上來

待千巖

寨裳望洞庭眼過天一角初別未甚愁別久今始覺作
箋非無筆寒雁不肯落蘆花待挈舟怪底北風惡

若人金石心試問洞庭浪傳聞下巴陵漉酒喜無恙我
行丹楓林屢騁白蘋望烏鵲不可嗔論功當坐上

呈徐通仲兼簡仲錫通仲與誠齋為鄉人近來赴
調而誠齋去國又通仲久與千巖有苔雪之約而
未至余挽通仲欲與同歸千巖故末章及之

斯文準乾坤作者難屈指我從李郭遊知有徐孺子春

風橋洲前白月太湖尾懷哉

一作我

來無期玉唾炯在紙

去年識仲氏何啻空谷喜合并忽自天傾倒見底裏維

君天下士竹箭東南美胡不在石渠諸公當料理千巖

今林宗泉石助風軌示病

一作疾

不下堂有句高八米此

老筆硯交誠齋古元禮毫端洒秋露去國詞愈偉屬聞

都門別回首即桑梓獨憐苔溪上垂榻俟行李煙波肯

尋盟歸棹為君儀

和轉菴丹桂韻

野人復何知自謂山澤好來禪奉常議識笳鼓羽葆誰
憐老垂垂却入鬧浩浩營巢猶是寓學圃何不早淮桂
手所植漢甕躬自抱花開不忍出花落不忍掃佳客夜
深來清尊月中倒一禪兩居士更約踐幽討

昔遊詩

變蚤歲孤貧再走川陸數年以來始獲寧處秋日無
謂追述舊遊可喜可愕者吟為五字古句時欲展閱

卷二十七
自省生平不足以為詩也

洞庭八百里玉盤盛水銀長虹忽照影大哉五色輪我
舟渡其中晃晃驚吾神朝發黃陵祠暮至赤沙曲借問
此何處滄灣三十六青蘆望不盡明月耿如燭灣灣無
人家只就蘆邊宿

放舟龍陽縣洞庭包五湖

澧沅瀘
湘大江

洶洶不得道茫茫將

奈何篙師請小泊石矸沈泥沙是中大無岸強指葦與
莎滯留三四晨大浪山嵯峨同舟總下淚自謂餵龜鼉

白水日以長僅存青草芽轉盼又已沒但見千頃波此
時羨白鳥飛入青山阿

九山如馬首一一奔洞庭小舟過其下幸哉波浪平大
風忽怒起我舟如葉輕或升千丈坡或落千丈坑回望
九馬山正與大浪爭如飛鵝車碾亂打睢陽城又如白
獅子山下跳猙獰須臾入別浦萬死得一生始知茵席
濕盡覆杯中羹

蕭蕭湘陰縣寂寂黃陵祠喬木蔭樓殿畫壁半傾欹蘆

洲雨中淡漁網煙外歸重華不可見但見江鷗飛假令
無恨事過此亦依依

吾乘五板船將入沌河口大江風浪起夜黑不見手同
行子周子渠膽大如斗長竿掙蘆席船作野馬走不知
何所詣生死付之偶忽聞入草聲燈火亦稍有棧船遂
登岸亟買野家酒

天寒白馬渡

漢川
縣界

落日山陽村是時無霜雪萬里風奔

奔外旃吹已透內纊冰不溫吹馬馬欲倒吹笠任飛翻

不見行人但見草木蕃
忽看野燒起火焰燒乾坤聲
若震雷震勢若江湖吞虎豹
走散亂麋鹿不足言夜投
野店宿無壁亦無門此行值三厄
幸得軀命存明發見
老姊斗酒為招魂

揚舡下大江日日風雨雪留滯
鼇背洲十日不得發岸
冰一尺厚刀劍觸舟楫岸雪一丈深
屹如玉成堞同舟
二三士頗壯不恐懾蒙毡
開篷卧波裏任傾折晨興視
毡上積雪何皎潔欲上不得梯
欲留岸頻裂攀援始得

上幸有人見接荒村三兩家寒苦衣食缺買猪祭波神
入市路已絕如今得安坐間對妻兒說

青草長沙境洞庭渺相連洞庭西北角雲邊更無邊後
有白河沌渺莽里數千豈惟大盜窟神龍所盤旋白湖
辛已歲忽墮死蜿蜒一鱗大如箕一髯大如椽白身青
鬚鬣兩角上梢天半體卧沙上半體猶沈淵里正聞之
官官使吏致虔作齋為禳禱觀者足闕闕斂席覆其體
數里間腥羶一夕雷雨過此物忽已遷遺跡陷成川中

可行大船是年金亮至送死江之壩或云祖龍識詭異
非偶然近日山陽人采菱不知還望見三龍浮目若電
火燃見龍多見尾少見四體全一龍已為異三者亦罕
傳又因漁湖側水中忽生煙煙中一驢出繞身步蹠蹠
俄墮霹靂去欲語無由緣我聞語此事乘舟往觀焉徑
往枯葭浦白鷺爭相先湖有劉備廟實司浩渺權徘徊
無所見歸棹月明前

昔遊洞源山先次白馬渡

桃源
縣界

渡頭何清深鴻鵠在高

樹白馬亦洞天昔人有奇遇洞門不可見但聞水聲怒
瞻彼羽人宅乃乘方船渡修廊夾五殿重閣映千樹規
模象魏壯四合綠陰護山椒望五溪壺頭入指顧故宮
在其北屋瓦帶松霧古杉晉時物中空野人住外圍四
千尺內可十客聚我遊瞿仙館壇上表遺步却下八疊
坡一亭衆妙具兩山抱澄潭老木枝榦互瞻前秀而迴
坐久凜難駐桃源獨不見僻在南宮路山行轉深窅狙
猿吟上下石竇出微涓令吾意猶豫昔聞漁舟子水際

見洞戶今看去溪遠定自後人誤惆悵却歸來此遊不
得屢於今二十年歷歷經行處

昔遊衡山下看水入朱陵半空掃積雪萬萬玉花凝或
如生綃掛或作薄霧橫紛紛虎豹吼往往蛟龍驚人語
不相聞濺電漂風纓有魚綠峭壁上上終不停此中有
神物雷雨周八絃

昔遊衡山上未曉入幽谷欲識所坐與橫板掛兩竹狀
如秋千垂高下不傾覆登山九千丈中道多佛屋一峯

高一峯一峯秀林木仰看同來客木末見冠服高堂石
橋路尋常雲所宿下方雷雨時此上自晴旭紫蓋何突
兀萬里在一目餘峯六七十僅如翠浪轟此有嬾瓚巖
大石庇樵牧下窺半厓花杯盃琢紅玉飛雲身畔過攬
之不盈掬祝融最高絕紫蓋不足錄俯視同仰觀蒼蒼
萬狀伏惟餘岫嶮峩峩峯南睇半空綠彷彿認瀟湘向嶽流
屈曲高處驚吾魂翻思宅平陸其東有雷穴靈異謹勿
觸雲來綿世界雲去一峯獨僧窻或留罇雲入不可逐

絕頂橫石渠仙人有遺躅山多金光草夜半如列燭靈藥不可尋吁嗟歸太速

濠梁四無山坡陲亘長野吾披紫茸毡縱飲面無赭自矜意氣豪敢騎雪中馬行行逆風去初亦畧霑洒疾風吹大片忽若亂飄瓦側身當其衝絲鞵袖中把重圍萬箭急馳突更叱咤酒力不支吾數里進一竿燎茅烘濕衣客有見留者徘徊望神州沈嘆英雄寡

既離湖口縣未至落星灣舟中三兩程兩程見廬山廬

山遮半天五老雲為冠
朝看金疊疊暮看紫巉巉
瀑布在山半彷彿認一斑
廬山忽不見雲雨滿人間

雪霽下揚子間望江上山
山山如白玉日照金屏顏
是時江水淨影落清鏡寒
潮催庾信老雲送佛狸還
萬古感心事惆悵垂楊灣

衡山為真宮道士飲我酒
共坐有何人山中白衣叟
問叟家何在近住山洞口
殷勤起見邀徐步入林藪
雲深險怪黑石亂湍水吼
尋源竹漸遠茅屋前如帚
老烹茶

味苦野啄琴形醜
叟云司馬君學道此仙久
屋東大盤石碁畫今尚有
古木庇覆之清泉石根走
因悲百年力汲汲成白首
仙人固難值隱者亦可偶
追惟恍如夢欲畫無好手

附潘檉德久書昔遊詩後

我行半天下未能到瀟湘
君詩如畫圖歷歷記所嘗
起我遠遊興其如鬢毛霜
何以舒此懷轉軫弦清商

又附韓滄仲止

平生未踏洞庭野亦不曾登南嶽峯因君談舊遊恍如
嘗相從江淮歷歷轉湘浦裘馬意氣傳邊峯吾嘗汎大
江只見匡廬松乘風醉卧帆影底高浪直濺嵐光濃日
暮泊船時是夜方嚴冬雪花壓船船背重攬搖施鼓聲
如鐘當年意淺語不到無句可寫波濤樁君詩乃如許
景物不易供盡歸一毫端狀若羣飛龍人問勝處貴著
眼雖有此興無由逢錢塘山水亦自好奈何薄宦難從
容南高北高一千大潮頭日夜鳴靈蹤應有隱者為識

賞青鞵布襪扶杖筇君無說彼我愧此急還詩卷心徒
忪

七言古詩

送王孟玉歸山陰

淮南雪落雲繞戍王郎鳴鞭獵狐兔問君本是山陰人
何不扁舟剡溪去人生樂事將無同知君此心如太空
只今去踏龍尾道也似寒江菘笠翁鑑湖一曲荷花浦
君不歸來花有語舊宅應添竹幾竿到家不覺秋如許

十年雪裏看淮南聚米能作淮南山籌邊妙處須急吐
正自不容脩竹間人道長江無六月日光正射青蘆葉
何以贈君濯炎熱雪即是詩詩是雪

烏夜啼

老烏棲棲飛且號晨來枝上啄楮桃楮桃已空楮葉死
猶啄枯枝覓蟲蟻老烏賦分何其貪未啼已被鄰公嗔
吁嗟老烏不自省墻頭屋上紛成羣吳中貴遊重鸚鵡
千金致遠能言語花底紅條鄭袖擎盤中碧果秦宮取

天生靈物得人憐
過者須來鸚鵡邊
老烏事事無足錄
人間猶傳夜啼曲

余居苔溪上與白石洞天為鄰
潘德久字予曰白石道人
且以詩見畀其詞曰
世間官職似撈菹采
到枯松亦大夫
白石道人新拜號
斷無繳駁任稱
呼予以長句報貺

南山仙人何所食
夜夜山中煮白石
世人喚作白石仙
一生費齒不費錢
仙人食罷腹便便
七十二峯生肺肝

真祖只在南山南吾欲從之不憚遠無方煮石何由軟
佳名錫我何敢辭但愁自此長苦飢囊中只有轉菴詩
但當掬水三嚙之

轉菴德久
白號云

丁巳七月望湖上書事

白天碎碎如折綿黑天昧昧如陳玄白黑碎處青天出
海月飛來光尚濕是夜太史奏月蝕三家各是爭筭術
或云七八或食既或云食晝不在夕上令御史登吳山
下視海門監月出年來厯失無人修三家之說誰為優

乍如破鏡光炯炯漸若小兒初食餅時方下令嚴禁銅
鏡破何為東海東天邊有餅不可食聞說飢民滿淮北
是鏡是餅且勿論須臾還我黃金盆金盆當空四山靜
平波倒浸雲天影下連八表共此光上接銀河通一冷
御史歸家太史眠人間不聞鐘鼓傳白石道人呼釣船
一瓢欲酌湖中天荷葉擺頭君睡去西風急送敲窻句

送陳敬甫

十年所聞溢吾耳去年誦君書一紙古人三語得奇士

況此磊落數百字相逢千巖萬壑裏有客如君請兄事
才高自古人所忌論高不售反驚世好詩取客如券契
我無三者獨至是如君之貧不可避呼舟徑渡寒潮外

生雲軒

在山長與雲同儕出山憶雲雲不來千金買得太湖石
數峯相對寒崔嵬朝來忽覺青苔濕黓黓如炊石間出
白雲何處不相逢却怪年年枉相憶三郎胸中橫一丘
在山出山雲與遊更呼白石老居士來倚雲根吟七字

送項平甫倅池陽

項侯聲名天宇窄與君俱是荆湖客向來相聞不相值
長安城中乃相識論文要得文中天邯鄲學步終不然
如君筆墨與性合妙處突過蘇李前我如切切秋蟲語
自謂平生用心苦神凝或與元氣接屢舉似君君亦許
西湖一曲古墻陰清坐論詩夜向深見謂人間有公等
不知來者不如今乾坤雖大知者少君不見古人拙處
今人巧我徂山林口掛壁如君合救狂瀾倒石渠春水

綠泱泱閣下無人白日長萬里江湖入歸夢子雲不願
校書郎九華山色梅根渡半日風帆即秋浦六條察吏
安用許幸有千巖作詩侶

書乞米帖後

銀鈎鐵畫太師字從人乞米亦可憐五倉空虛胃神哭
竟日悄悄無炊煙仙人留書說服氣道士辟穀期引年
人生不食浪自苦獨不見子桑鼓琴十日雨

契丹歌

都下聞蕭總管自
說其風土如此

契丹家住雲沙中駕車如水馬若龍
春來草色一萬里芍藥牡丹相間紅
大胡牽車小胡舞彈胡琵琶調胡女
一春浪蕩不歸家自有穹廬障風雨
平沙軟草天鵝肥胡兒千騎曉打圍
卓旗低昂圍漸急驚作羊角凌空飛
海東健鶻健如許韜上風生看一舉
萬里追奔未可知劃見紛紛落毛羽
平章俊味天下無年年海上驅羣胡
一鵝先得金百兩天使走送賢王廬
天鵝之飛鐵為翼射生小兒空看得
腹中驚怪有新薑元是江南經宿食

禽言如曰哥哥

君不見苔溪向南石鼓山鳥如鸚鵒啼其間土人相傳
是阿弟千呼萬喚去復還身為獨雁失儔侶所愧脊令
圖急難繞林哀哀訴明月夜闌月落潮聲咽天地濶遠
兄不聞蒼厓下淚山竹裂豈無鴉舅與鶻姑人各有心
非友于陟岡四顧空欵欵君不見江南望夫誰家子登
山化石不得語

次韻誠齋送僕往見石湖長句

客來讀賦作雌蜺平生未聞衡說詩省中詩人官事了
狎鷗入夢心無機韻高落落懸清月鏗鏘妙語春冰裂
一自長安識子雲三嘆郢中無白雪范公蕭爽思出塵
有客如此渠不貧堂堂五字作城守平章勁敵在君口
二公句法妙萬夫西來囊中藏魯瑱只今擊節烏棲曲
不愧當年賀鑑湖

五言律詩

悼石湖三首

身退詩仍健官高病已侵江山平日眼花鳥暮年心九
轉終無助三高竟欲尊尚留巾墊角荒外有知音

未作龍蛇夢驚聞露電身百年無此老千首屬何人安
得公長健那知事轉新酸風憂國淚高塚卧麒麟

未定情鍾痛何堪更悼亡遺書知伏枕來弔只空堂雪
裏評詩句梅邊按樂章沈思酒杯落天濶意茫茫

題華亭錢參園池

花裏藏仙宅簾邊駐客舟浦涵滄海潤雲接洞庭秋草

木山山秀闌干處處幽機雲韜世業暇日此夷猶

同朴翁登卧龍山

龍尾回平野簷牙出翠微望山憐綠遠坐樹覺春歸草
合平吳路鷗忘霸越機午涼松影亂白羽對禪衣

坐上和約齋

句入冰輪冷愁因玉宇開可無如此客猶恨不能杯好
句長城立寒鴉結陣來筇篻莫停手拚却斷腸回

出北關

吳兒臨水宅四面見行舟蒲葉浸鵝項楊枝蘸馬頭
年年去國夜夜月窺樓傳語城中客功名半是愁

答沈器之二首

江漢乘流客乾坤不繫舟玉琴虛素月金劍落清秋
野鹿知隨草飢鷹故上鞦風流大堤曲一唱使人愁
涉遠身良苦登高望欲迷試吟青玉案不是白銅鞮
露下秋蟲怨風高北馬嘶槎頭有新味人在太湖西

菖蒲

岳麓溪毛秀湘濱玉水香靈苗憐勁直達節著芬芳豈
謂盤盂小而忘臭味長拳山并勺水所至未能量

范大參入覲頗愛鄙作以詩謝之

問句石湖老如將月指標枯中說滋味高處戒虛驕頗
喜唐音近寧論漢道遙政聲今在耳萬樂聽蕭韶

小孫納婦

慶事集朋親孫枝喜氣新欵雲停碧落舞雪眩青春暖
日花君子清樽酒聖人一春行樂地不負牡丹辰

七言律詩

送朝天續集歸誠齋時在金陵

翰墨場中老斲輪真能一筆掃千軍
年年花月無間日處處山川怕見君
箭在的中非爾力風行水上自成文
先生只可三千首回施江東日暮雲

張平甫哀挽

將軍家勢出臞儒合上青雲作計疎
吳下宅成花未種湖邊地吉草新鉏
空嗟過隙催人世賴有提孩讀父書

他日石羊芳草路弟兄來此一沾裾

寄上張參政

姑蘇臺下梅花樹應為調羹故早開
燕寢休誇香霧重
駕行却望袞衣來
前時甲第仍垂柳
今度沙堤已種槐
應念無枝夜飛鵲
月寒風勁羽毛摧

京口留別張思順

伯勞飛燕苦為忙
還憶東齋夜共牀
別後無書非棄我
春前會面却他鄉
連宵為說經憂患
異日相逢各老蒼

更欲少留天不許
曉風吹艇入垂楊

次朴翁遊蘭亭韻

亞字橋亭面面風
六人同坐樹陰中
松交歸路如留客
石礙流杯故惱公
山色最憐秦望綠
野花只作晉時紅
夕陽啼鳥人將散
俛仰興懷自昔同

右軍祠堂有杜鵑
花兩株花極灼灼

次韻胡仲方因楊伯子見寄

此去廬陵定幾程
向來筇杖未經行
懸知征棹雲邊集
大有吟情雪裏生
楚渡食萍應甚美
舜祠吹玉直能清

二君即日青冥上惟我春山帶雨耕

仲方得萍鄉宰
伯子得營道宰

賀張肖翁參政

太乙圖書客屢談已知上相出淮南銀臺日月非虛過
金鼎功名得意參從此與人為雨露應憐有客卧雲嵐
明朝起為蒼生賀旋著衣冠紫竹簪

陳君玉以小集見歸用余還誠齋朝天續集韻作
七字夔報賦

筆陣無功汗左輪而今老去不能軍水邊白鳥間於吾

窗外梅花疑是君欲向江湖行此話可無朋友托斯文
新篇大是相料理因憶西山揚子雲

寄田郎

楚楚田郎亦大奇少年風味我曾知春風寒食誰相伴
夜月梨花有所思剪燭屢呼金鑿落倚窻閒品玉參差
含情不擬逢人說鸚鵡能歌自作詞

送王德和提舉淮泉

京塵吹帽汗淋衣相見頻年只道歸省裏移文那得了

家邊持節未為非
煮乾碧海知誰用
割盡黃雲尚告饑
可得不為根本計
秋風還是雁南飛

寄時父

遲君日日數歸程
到得君歸我已行
一路好山思共看
半年有酒不同傾
吾儕正坐清貧累
各自而今白髮生
人物眇然須強飯
天工應不負才名

送李萬頃

猛相思裏得君來
正喜歡時却便回
別路恐無青柳折

到家應有小桃開起居五馬草堂上問訊千巖及阿灰

張禕姪張曙
小字阿灰

兒女痴頑夫婦健漂零何日共尊壘

次韻千巖雜詠

平生中散七不堪玉麈時時伴燕談道士有神傳火棗
故人無字入雲藍雨涼竹葉宜三酌日落荷花倚半酣
極欲扁舟南蕩去冷鷗輕燕畧相語

寄上鄭郎中

梅根東望九華雲中有風流衣繡人石下一生勞夢想

尊前數語倍情親，旄在道催歸。
漢花鳥留君且作春，見說祥雲挾時雨，故園松菊亦精神。

送左真州還長沙

吳兒牽挽醉尊鱸，今日西歸畧自如。
別路冷雲隨驛馬，望鄉喬木記吾廬。
湘中花月偏憐酒，淮左兒童待擁車。
凡吾舊遊君更歷，橘洲相見訝無書。

乍涼寄朴翁

前日松間步屨歸，更將荷葉障秋暉。
如今城裏拋團扇。

應是山中試袂衣
水有秋容蓮漸少
樹含涼氣鳥慵飛
炎天既懶趨城市
從此尤須戀翠微

呈方叔

齧牙落魄一間官
職事何曾見一斑
不是論松須說劍
若非尋壑即觀山
間看落葉隨風去
冷笑奔雲送雨還
更有荆巖楊處士
伴渠癡坐老花間

夏日奉天台祿

看天揮筆卧籐牀
翠袖攜壺過酒漿
蝟腹出波烹芟實

裹蹄和露擘蓮房相呼時入雞豚社獨坐曾無雁鷺行
便是赤城真隱吏不須劉阮更相將

冬夜不寐

宵柝迢迢警睡魔靜思甘分老林坡忍饑但有嵇康懶
扣角曾無甯戚歌不起妄心思世事只將閒意養天和
時人休說長生術學著長生事轉多

閒詠

虛糜廩祿飲醇醪不狎文書不坐曹檢點花園為日課

哀尋詩草計年勞仍將書冊供慵卧時喚盃盤佐老饗
感激大恩何以報惟祈聖壽與天高

負暄

不是義和德澤流寒鄉何處覓溫柔絕憐天上紅錦襖
大勝人間紫綺裘旋掇胡牀隨影轉更攜詩卷與間謀
天和妙處人誰會欲獻君王却自羞

和陸放翁見寄

遙知三徑長荒苔解組東歸亦快哉津岸紛紛羣鳥去

船頭袞袞好山來
平時佳客應相過
勝日清樽想屢開
若許詩篇數還往
直須追挽古風回

和陸放翁

午庭風雨撼高槐
一洗城頭十丈埃
老子坐間尋好句
故人門外寄詩來
勁鋒久服穿楊妙
鈍思深慚擊鉢催
清珮左符君未可
要聽吟思發春雷

寄汪尚書

五十年間嘆濶疎
相忘兩地復江湖
書來筆底驚強健

金少府人八二
卷二百七十
詩去吟邊想步趨好對青山看歌舞莫嫌紅粉笑髭鬚
鳳毛已有哦松韻尚記金章舊範模

五言絕句

明妃詩

同潘德久
作三首

明妃未嫁時滿宮妬娥眉一朝辭玉陛人人淚雙垂
年年心隨雁日日穹廬中遙見沙上月忽憶建章宮
身同漢使來不同漢使歸雖為胡中婦只著漢家衣

古樂府三首

裁衣贈所歡曲領再三安歡出無人試閨中自著看
甚欲逐郎行畏人笑無媒日日東風起西家桃李開
今我歌一曲曲終郎見留萬一不當意翻作平生羞

與和甫時甫分題畫卷夔得剡溪圖

枯槎啁乾鵲交臂失夫君奈此一尊酒憑高空水雲

東堂聯句

金風涼夜深吹我蕭蕭髮起折丹桂枝驚落花上月

趙雍

和仲
白石

七言絕句

寄俞子

此郎都無子弟氣
夜對黃妳籠青燈
君今落腳墮鴛外
欲往從之嘆未能

郎罷才名今白髮
佐州亦復坐窮邊
甚欲出手相料理
東南風高難寄牋

牛渚

牛渚磯邊渺渺秋
笛聲吹月下中流
西風不識張京兆

畫得蛾眉如許愁

武康丞宅同朴翁詠牽牛

青花綠葉上踈籬
別有長條竹尾垂
老覺淡粧差有味
滿身秋露立多時

朴公悼牽牛甚奇余亦作

不見青青繞竹生
西風籬落抱枯藤
道人一任空花過
愁殺山陰覓句僧

過德清

木末誰家縹渺亭
畫堂臨水更虛明
經過此處無相識
塔下秋雲為我生

溪上佳人看客舟
舟中行客思悠悠
煙波漸遠橋東去
猶見闌干一點愁

過湘陰寄千巖

渺渺臨風思美人
荻花楓葉帶離聲
夜深吹笛移船去
三十六灣秋月明

雁圖

萬里晴沙夕照西此心惟有斷雲知
年年數盡秋風字
想見江南搖落時

除夜自石湖歸苔溪

此詩錄寄誠齋得報云所寄十詩有裁雲縫霧之妙思敲

金曼玉之奇聲

細草穿沙雪半銷吳宮煙冷水迢迢
梅花竹裏無人見
一夜吹香過石橋

美人臺上昔歡娛今日空臺望五湖
殘雪未融青草死
苦無麋鹿過姑蘇

黃帽傳呼睡不成
投篙細細激流水
分明舊泊江南岸
舟尾春風颭客燈

千門列炬散林鴉
兒女相思未到家
應是不眠非守歲
小窻春色入燈花

三生定是陸天隨
只向吳松作客歸
已拚新年舟上過
倩人和雪洗征衣

沙尾風回一棹寒
椒花今夕不登盤
百年草草都如此
自琢春詞剪燭看

笠澤茫茫雁影微
玉峯重疊護雲衣
長橋寂寞春寒夜
只有詩人一舸歸

桑間篝火却宜蠶
風土相傳我未諳
但得明年少行役
只裁白紵作春衫

少小知名翰墨場
十年心事只淒涼
舊時曾作梅花賦
研墨於今亦自香

環玦隨波冷未銷
古苔留雪卧墻腰
誰家玉笛吹春怨
看見鵝黃上柳條

臨安旅次答蘇虞叟

垂楊風雨小樓寒
宋玉秋詞不忍看
萬里青山無處隱
可憐投老客長安

姑蘇懷古

夜暗歸雲繞柁牙
江涵秋影鷺眠沙
行人悵望蘇臺柳
曾與吳王掃落花

次德久韻

籬落青青花倒垂
避人黃鳥雨中飛
西郊寂寞無車馬

時有溪童賣菜歸

次石湖書扇韻

橋西一曲水通村
岸閣浮萍綠有痕
家住石湖人不到
藕花多處別開門

竹友為徐南卿作

髮已星星帶已寬
徐郎猶是客長安
家山竹好無由看
漫種庭前一兩竿

世路蒼皇總是愁
暮年須得小優游
如今漸覺知心少

賸種青青伴白頭

壽朴翁

與師同月不同年
歸墨歸儒各自緣
想得山中無壽酒
但攜茶到菊花前

湖上寓居雜咏

荷葉披披一浦涼
青蘆奕奕夜吟商
平生最識江湖味
聽得秋聲憶故鄉

湖上風恬月澹時
卧看雲影入玻璃
輕舟忽向窻前過

搖動青蘆一兩枝

秋風低結亂山愁
千頃銀波凝不流
堤畔畫船堤上馬
綠楊風裏兩悠悠

處處虛堂望眼寬
荷花荷葉過闌干
遊人去後無簫鼓
白水青山生晚寒

輦路垂楊兩行栽
苑門秋水欲平堦
朝朝南望宮雲起
白鳥一聲山下來

微波衝得綠萍開
數點青青粘石堦
綠葑自來還自去

來時須載白鷗來

布衣何用揖王公
歸向蘆根濯軟紅
自覺此心無一事
小魚跳出綠萍中

囊空萬字總空言
露滴桐枝欲斷絃
時事悠悠吾亦懶
卧看秋水浸山煙

苑牆曲曲柳冥冥
人靜山空見一燈
荷葉似雲香不斷
小船搖曳入西陵

處士風流不並時
移家相近若依依
夜涼一舸孤山下

林黑草深螢火飛

臨榻看山綠漲天角門長泊釣魚船而今漸欲拋塵事
未了菟裘一悵然

鈎窻不忍見南山下有三雛骨未寒惆悵古今同此味
二陵風雨晉師還

柳下軒牕枕水開畫船忽載故人來與君同過西城路
却指煙波獨自回

指點移舟著柳堤美人相顧復相攜上橋更覺秋香重

花在西陵小苑西

平甫見招不欲往

老去無心聽管絃
病來杯酒不相便
人生難得秋前雨
乞吾虛堂自在眠

樓閣萬重秋雨裏
峯巒四合暮潮邊
鳳城今夕涼如水
多少人家試管絃

三高祠

越國霸來頭已白
洛京歸後夢猶驚
沈思只羨天隨子

蓑笠寒江過一生

過桐廬

橫看山色仰看雲十幅風帆不藉人
記取合江江畔樹
他年此處好垂綸

過垂虹

自作新詞韻最嬌
小紅低唱我吹簫
曲終過盡松陵路
回首煙波十四橋

登烏石寺觀張魏公劉安成岳武穆留題劉云侍

兒意真奉命題記

諸老凋零極可哀尚留名字厭崔嵬劉郎可是踈文墨
幾點胭脂污綠苔

項里

項里項王之里也在山陰西南二十餘里地多楊梅
苔梅皆妙天下王性之賦項里楊梅云只令枝頭萬
顆紅猶似咸陽三月火予近得苔梅一枝古怪特甚
為作七言

舊國婆娑幾樹梅
將軍逐鹿未歸來
江東父老空相憶
枝上年年長綠苔

雪中六解

塞草汀雲護玉鞍
連天花落路漫漫
如今却憶當時健
下馬題詩不怕寒

黃鶴磯邊晚渡時
柳花風急片帆飛
一聲長笛魚龍舞
白浪如山不肯歸

萬馬行空轉屋簷
高寒屢索酒杯添
故人家住吳山上

借得西湖自捲簾

曾泛扁舟語石湖
恍然坐我范寬圖
天寒遠掛一行雁
三十六峯生玉壺

萬壑千巖一樣寒
城中別有玉龍蟠
舊人乘興扁舟處
今日詩仙戴笠看

沈香火裏笙簫合
煖玉鞍邊雉兔空
辨得煎茶有驕色
先生只合作詩窮

越中士女春遊

秦山越樹兩依依
閒倚闌干看落暉
楊柳梢頭春又暗
玉簫聲裏夜遊歸

送范仲訥往合肥三首

壯志只便鞍馬上
客夢長在江淮間
誰能辛苦運河裏
夜與商人爭往還

我家曾住赤欄橋
鄰里相顧不寂寥
君若到時秋已半
西風門巷柳蕭蕭

小簾燈火屢題詩
回首青山失後期
未老劉郎定重到

煩君說與故人知

下菰城

人家多在竹籬中
楊柳踈踈尚帶風
記得下菰城下路
白雲依舊兩三峯

平甫放三十二鷗於吳松余不及與盟

橋下松陵綠浪橫
來遲不與白鷗盟
知君久對青山立
飛盡梨花好句成

蕭山

歸心已逐晚雲輕
又見越中長短亭
十里水邊山下路
桃花無數麥青青

戊午春帖子

晴窻日日擬雕蟲
惆悵明時不易逢
二十五絃人不識
淡黃楊柳舞春風

偶題

阿八宮中酒未醒
天風吹髮夜泠泠
歸來只怕扶桑暖
赤脚橫騎太一鯨

陳日華侍兒讀書

繹句尋章久未休
花房日晏不梳頭
誰教郎主能多事
乞與冥冥千古愁

女郎山

漢陽縣西
二十里

不見郢中能賦客
可憐負此女郎山
冰魂寂寞無歸處
獨宿鴛鴦沙水寒

釣雪亭

關干風冷雪漫漫
惆悵無人把釣竿
時有官船橋畔過

白鷗飛去落前灘

綠萼梅

黃雲承鞞知何處
招得冰魂付北枝
金谷樓高愁欲墮
斷腸誰把玉龍吹

次韻武伯

楊柳風微約暮寒
野禽容與只波間
道人心性如天馬
可愛青絲十二闌

觀燈口號

金史四庫全書
卷二百七十
世間形象畫成燈烘火旋紗巧思生列肆又多看不徧
遊人一一把燈行

市樓歌鼓太諠譁燈若連珠照萬家太守令嚴君莫舞
遊人空戴玉梅花

遊人俱戴孟家蟬爭托星毬萬眼圓鬧裏傳呼大官去
後車多少盡嬋娟

花帽籠頭幾歲兒女兒學著內人衣燈前月下無歸路
不到天明亦不歸

好燈須買不論錢，別有琉璃價百千。
都下貴人多預賞，買時長在一陽前。

珠絡琉璃到地垂，鳳頭銜帶玉交枝。
君王不賞無人進，天竺堂深夜雨時。

紛紛鐵馬小回旋，幻出曹公大戰年。
若使英雄知此事，不教兒女戲燈前。

貴客鈎簾看御街，市中珍品一時來。
簾前花架無行路，不得金錢不肯回。

修內司人偏戲鼓鞀宮營裏獨燒燈
春風到處皆君賜
金柳絲絲滿鳳城

正好嬉遊天作魔
翠裙無奈雨沾何
御街暗裏無燈火
處處但聞樓上歌

陪張平甫遊禹廟

鏡裏山林綠到天
春風只在禹祠前
一聲何處提壺鳥
猛省紅塵二十年

燈詞

南陌東城盡舞兒
畫金刺繡滿羅衣
也知愛惜春遊夜
舞落銀蟾不肯歸

燈已闌珊月氣寒
舞兒往往夜深還
只因不盡婆娑意
更向階心弄影看

沙河雲合無行處
惆悵來遊路已迷
却入靜坊燈火室
門門相似列蛾眉

遊人歸後天街靜
坊陌人家未閉門
簾裏垂燈照樽俎
坐中嬉笑覺春溫

春詞

六軍文武浩如雲
花簇頭冠樣樣新
惟有至尊渾不戴
盡將春色賜羣臣

萬數簪花滿御街
聖人先自景靈回
不知後面花多少
但見紅雲冉冉來

同恬朴翁過淨林廣福院

四人松下共盤桓
筆硯花壺石上安
今日興懷同此味
老仙留字在孱顏

三高祠

見姑蘇志

不貪名爵伐功勞
勇退深虞後患遭
甫里間居畊釣樂
范張高處陸猶高

于越亭

松尾颼颼石浪寒
靜聽蕃曲轉聲酸
人間無此春風手
應是江妃夜夜彈

六言

金神夜獵圖二首

夜半金神羽獵奔走山川百靈雲氣旂旗未下颯然已
入青冥

後宮嬋娟玉女自鞚八尺飛龍兩兩鳴鞭爭導綠雲斜
墜春風

次韻鴛鴦梅

晴日小溪沙暖春夢憐渠頭交只怕笛聲驚散費人月
詠風嘲

漠漠江南煙雨于飛似報初春折過女郎山下料應愁

殺佳人

馬上值牧兒

馬背何如牛背短
衣落日空山只麼身
歸盤谷未須名
滿人間

兩宋名賢小集卷二百七十

欽定四庫全書

兩宋名賢小集卷二百七十一

宋 陳思 編

元 陳世隆 補

梅屋吟

鄒登龍字震父臨江人隱居不仕結屋於邑之西郊
種梅繞之自號梅屋有孤山處士之遺風焉吟藁一
卷劉後村戴石屏真西山咸稱之

關山月

行人十年歸不得
夜上戍樓看明月
樓中星斗連太白
樓外關山雁飛絕
雁飛絕歸不得
鏡裏青娥怨離別
前年出幽燕
明月何團圓
去年上祁連
明月復嬋娟
月明照我長枕戈
邊塵未靜將奈何
憑誰寄書問嫦娥
征衲不來霜霰多

從軍行

年少良家子
投身事西北
金鳴鬪馬嘶
蕭蕭短兵發
夜

戰祁連山斷甲濺腥血番部帶箭降番前連陣沒勒功
紀燕然椎鼓歸漢闕

結客少年場

并兒任氣俠年少肝膽雄錦臂金彈丸銀鞍玉花驄腰
插三尺劍手開二石弓輕生重大義一戰朔庭空斬取
戎王頭提奏甘泉宮

秋夜長曲

碧簾掛雨秋容老寂寞江城暝煙草流蘇帳冷屏山低

密炬香消睡常早夢驚離緒牽愁入翠被寒侵淚花濕
思美人兮天一方烏啼月落西風急

青樓曲

青樓女兒十五六翠掠雲鬟妙裝束千金學舞拜部頭
新來教得涼州曲錦鞦少年被花腦醉把金釵換香草
西風樓前秋雁飛舞衣狼籍花顛倒

採蓮曲

平湖淼淼蓮風清花開映日紅粧明一雙灘鷺忽飛去

為驚花底蘭橈鳴蘭橈蕩漾誰家女雲妥髻髮黛眉嫵
采采荷花滿袖香花深忘却來時路

江南春

玲瓏樓閣江城晚楊柳絲絲凝碧煙飛燕不歸春滿地
百花香裏聽啼鷓

長門怨

怨殺宮門不忍開無情孤月暗蒼苔而今痛惜珊瑚枕
曾是君王賜御來

巫山高

巫山龍從巫峽曲一十二峯淺凝綠老猿化石懸巖崖
轟轟陵雲掃壇竹九靈少女列仙從佩玉鳴鸞乘綵鳳
飛魂步魄歸瑤宮紫簫吹斷荆王夢

雪霽梅月曲

羌玄圃兮玉英蹇冰輪兮太清綺縞袂兮誰子粲一笑
兮傾城倚橫吹兮寄哀思擘幽香兮補騷情

遊仙

人命如朝露壽非金石堅安得傳六翮飄飄凌紫煙夕
夢一道士羽衣何翩躚邀我與之去同上扶桑巔道遇
青童君授以東華篇讀之三百遍忽若骨已仙道士復
謂我玄訣未可傳賜我以瓊漿飲之享遐年明發寂無
覩孤鶴翔九天

詠懷

洪河相綿纏真宅良可卜蒼松蔭長蹊叢梅馥四屋過
亭白水飛流鳴漱寒玉游目俯靈景抱杖委繁俗長吟

暢幽懷理琴展清曲豈不企凌厲而乃傷局促吉士抗
遐蹤幽人聚靈族

步出城東門

步出城東門與子各執手遙望冢累累悲風發隴首長
松自青青枯根帶骨朽人生如朝露嘉命那可久世無
王子喬何訣以固壽感慨徒悲傷歡言且飲酒

山上有白雲

山上有白雲浮陰翳陽光亭亭颯續紛出岫高飛翔飛

翔長在望遠匪千里隔莫以秋風來吹散無踪跡

秋夜懷菊山沈莊可

涼風動金旻奄忽寒節至百卉俱萎垂梧桐亦飄墜
明月入我牖輾轉不能寐顧影重傷心思君長下淚

歲晚懷愚齋趙叔愚壺山宋謙父

忽忽歲將暮烈烈北風涼霏霏雨素雪皎皎南枝芳
慘念良友莞莞在他鄉盈盈一水隔迢迢道路長
悠悠無信音戚戚重感傷翩翩化鶴去一去與同翔

月洲李賈友山捧檄來淦訪我梅下示教禁體物
語詠梅佳句今歲梅開月洲仙去追和元韻感此

良友

庭前有寄樹幽豔發南柯寂寂衆芳歇綿綿生意多孤
根依嶺表高節委巖阿清友今何在悠悠空逝波

和竹里蘇材叔見梅懷友韻

徘徊江路側何以慰相思陽彩來寒樹貞姿倚暮籬飄
零懷遠道遼索負芳時佇立幽吟苦餘懷將訴誰

西郊梅開懷吟軒周獻父

仲冬寒氣盛玄雲停故陰嘉樹厲清節孤芳潔素心幽
幽熒歲落皎皎隔塵侵折寄無來使山川迴且深

滕閣懷古

凭高獨展眺風葉亂鳴秋鸞舞自空閣漁歌尚晚舟卷
簾山歷歷倚檻水悠悠月出江城暮淒涼萬古愁

寄雲林楊少雲自衡之桂

問訊楊夫子經年客異鄉南浮湘水遠西望楚天長五

嶺梅花發孤亭草色荒白雲遙滿目曷久住炎方

寄呈後村劉編修

衆作紛紛筭噪蟬先生中律更鈎玄如開元有二三子
自晚唐來數百年人競寶藏南嶽藁商留金易後村編
儻令舐鼎隨雞犬凡骨從今或可仙

戴式之來訪惠名屏山集

詩翁聲價滿江湖肯訪西郊隱者居瘦似杜陵常戴笠
狂如賈島少騎驢但存一路征行稿安用諸公介紹書

篇易百金寧不售全編遺我定交初

江居

獨作幽居計江邊屋數間水流天自在心遠地寬閒
鉏月栽梅樹移雲疊石山白鷗盟欲結倚杖看潺湲

溪村

兀兀小橋西人家住繞溪雲山當戶入竹樹出簷齊
風急花初盡春深鶯亂啼稻畦新雨足樺子亦鉏犁

題杜少陵草堂圖

背郭好林塘，誅茅作草堂。
因吟白鶴谷，為卜碧雞坊。
龍竹如煙淨，江梅帶雪香。
四松經喪亂，閱世幾風霜。

遊玉笥山

玉笥凌空後，天都詔吏仙。
荒壇深覆草，峭壁響流泉。
石洞隨龍蟄，金丹許鶴傳。
夜深搗藥鳥，啼破翠微煙。

入投龍洞

行入投龍洞，青青見竹竿。
暮雲生道樹，夜月滿仙壇。
枯蘚沿崖古，長松繞澗寒。
三生清淨福，獨此愧黃冠。

上慧力寺

今代空王宅前朝處士家
牛車為象藏鹿苑發龍華
松密風生樹江空月在沙
閣黎飯鐘後邀我試新茶

寄蒼山曾子寔

東湖從此別嘉會邈無期
望遠音書阻思君歲月馳
春雲山隔斷秋雨雁歸遲
欲見崆峒使梅花寄一枝

幽事

閒攜小斧刪梅樹自縛枯藤
補菊籬燒柏子香讀周易

滴荷花露寫唐詩

遊仰山寺

施地開金刹神因結佛緣
怪松盤懶徑古木護龍淵
雲裏春山亂禽啼夜月圓
路遙歸不得好借上方眠

宮詞

內人倚遍玉樓東
曉色間雲臘雪融
羯鼓一聲花盡拆
三郎自喚作天公

梅花

約臂金寒拓綺疏搔頭玉重壓香酥含章簷下新妝額
試啟菱花得似無

送表兄趙奏院赴南外知宗

御屏往往題名字朝路彬彬藹薦書天許留中監邸奏
日求補外得堂除暫煩龍種司瑤籍行立駕班侍玉輿
丙枕或思前夜席庚郵寧肯後鋒車

王氏山居

聞道山居好林深遠俗情茶煙薰壁暗蘿月射窻明學

金方日人ノ二二
卷二百七十一
稼修禾譜栽花識藥名無人覺幽隱為有讀書聲

送雲巢曾校勘赴名

高卧雲巢久雲生處士衣忽聞頒詔札推入侍經幃朝
野名雖盛山林志莫違好歸清澗隱富貴有危機

水亭

闌檻玲瓏直又橫半臨池水著新亭擬招鷺宿栽添葦
怕礙魚行掠去萍五月藕花千樣錦四時山色一般青
有閒來此尋幽賞莫看人間淡墨屏

趙承遠雲

聞道幽居好
棲雲結數椽
庭深闕竹雨
衣潤染茶煙
嵐氣生朝壁
湍聲入夜弦
半山飛動意
未得痾林泉

兩宋名賢小集卷二百七十一

欽定四庫全書

兩宋名賢小集卷二百七十二

宋 陳思 編

元 陳世隆 補

心游摘藁

劉翼字躔父福唐人有心游摘藁

題心游樓

一自浮光抵玉融東林山曲世為農前場歲計禾麻麥

後園年深竹荔松博我多聞千載史喚人深省五更鐘
不消更會楞嚴語面面披雲挹曉峯

心游樓卽事

禪坐寧離此意行何所如稻梁詩七月果木賦間居活
水嘗新茗顛風落舊書無才甘用拙不是隱樵漁

癸卯十月同林子宜拜掃先師樂軒墓因和南谷

寺壁間韻

秋風颯颯已華顛男女猶賒嫁娶錢問道西軒空有夢

繡經南谷恐無緣登墳薦酒徒為爾對佛拈花亦偶然
回首白雲無叫處青山長在淚痕邊

答林昌宗詩筌韻

經鋤小暇弄詩筌老去仍知點是禪滄海移舟盡琴趣
雖然終不似無絃

題東臯詩卷

雪竹霜松不老身儘教後進笑陳人相逢亦有吟詩客
誰似先生語意真

書情

蕭疎遠市囂山窟雜魚樵窮鬼乘吾拙錢神挾汝驕世
途自巖嶮真性本逍遙尚想榮期樂綸巾傲漢貂

夜意

平生萬事水東流獨有多情是風癢夜長無寐月窺牀
擁被孤吟起遐想

伯言見和拙作以漢隸書之謝以七韻

李潮善八分求歌杜陵吏有人和我詩半紙餘科斗風

雲生其懷劍戟出其手石經中郎蔡新樣元和柳元常
文不傳退之書何有待我農隙時載筆隨君後袖手眼
亦明聊與之飲酒

偶見官舍梅花作

天然標格自蕭疎底用松篁水月俱但是梅花皆可愛
何關東閣與西湖

輓教儀仲

半面春風已有情別來重見眼終青空齋夜雨十年後

一醉黃花叫不醒

對坐茶甌日雨迴
曾懷真率向人開
茶甌對客如前度
不見先生杖履來

晝倚籃輿餞一杯
殷勤別語到簾幃
那知此夜成長往
書屋無人月掩扉

書中有種復何愁
酒興詩狂卒未休
莫唱橫塘斷腸句

不堪斜日獨登樓

儀仲有題
心游樓詞

送二子從子宜讀書

三代讀書無寸功又將此法教兒童旁人笑我背時好
不背旁人背樂翁

山寺聽雨

問道論詩也一宗燒柴煨芋佛家風要知真樂人間少
聽雨空山破寺中

戲和劉雪巢題壁韻

劉有不知何處
有唐詩之句

吟懷只怕俗塵迷若慕唐人也自癡要識性情根極處
請觀三百五篇詩

題平遠軒呈竹溪王堂

溪堂闢小軒此景絕可愛
蔡松道東邊千載典型在高
低萬頃田面勢溪向背生
綃一幅寬晴雨不盡態中有
謫仙人來尋華野耒畎畝
雖不忘知進不如退乾坤入
醉眼風月出吟喙我非人境
游亭在人境內心平水不
波見遠山無礙時攜琰石
遊間以劉白輩僕忝老諸生
來扣佛三昧

題簡上人西亭詩文後

真如非字義綺語道之疵未見西亭作長為北礪欺晚
因僧媚遠初實客從曦多少才名士沈淪世不知

夢呈樂軒先生既覺不失一字錄呈竹溪玉堂

不見仙翁四十春幸然立隴在北鄰當年四海從游者

報佛深恩有幾人

艾軒先生工部侍郎文節林公一傳
為網山林先生諱亦之字學可再傳

為樂軒林先生諱藻字元潔時
有集行世竹溪樂軒之嫡子也

兩宋名賢小集卷二百七十二

欽定四庫全書

兩宋名賢小集卷二百七十三

宋 陳 思 編

元 陳世隆 補

石屏續集一

戴復古字式之天台黃巖人居南塘石屏山因自號
焉負奇尚氣慷慨不羈少孤痛父東臯子遺言收拾
殘稿遂篤志於詩從雪巢林景思竹隱徐淵子講明

句法復登放翁之門而詩益進南遊甌閩北窺吳越
逾梅嶺窮桂林上會稽絕重江浮彭蠡汎洞庭望匡
廬五老九疑諸峯然後放於淮泗歸老委羽之下遊
歷既廣聞見益多為學益高深而奧密以詩鳴江湖
間五十年

客行河水東

客行河水東客行河水西客行河水南客行河水北行
行無已時朱顏變老色至人棲一方庭戶羅八極保心

如止水不受萬物役有道肥其軀故能適所息

鳳鳴有吉凶

鵲叫令人喜鴉噪令人憎人心自分別吉凶屬禽聲舜
時有鳳鳴文王時亦鳴漢時鳳亦鳴六朝時亦鳴鳳鳴
有吉凶人不仔細聽

江南新體

王建有此體
別張誠子

郎船江下泊妾家樓上住朝朝暮暮間上下兩相顧相
顧不相親風波愁殺人

感寓四首

采薇人固高，飲露蟬遂清。謀茲一粒粟，舉世共營營。
營亦多塗中，有虧與盈陋。巷一簞食，朱門九鼎烹。窮達
各有命，繫誰主。權衡吾生未，可必秋風白髮生。

蛛網罨虛簷，一飽羅羣飛。寒蠶嚙枯桑，一身終繭絲。物
巧生理我，生拙奚為貂。裘日已敝，石田歲長饑。一貧
已到骨，一氣儻未衰。舉目送飛鴻，悠悠知我誰。

夜雨挾秋風，撼撼庭樹浮。生堪幾秋青，鬢忽已素鉛。

刀剗九牛策蹇望長路所操莽無奇自好徒自誤改絃
調新聲履道易故步收功在桑榆其敢忽遲暮

紅紫委路塵綠樹有嘉色剗心晚聞道玩物若有得青
春坐銷歇方茲見真實人生到中年胡不保明德秋風
墮庭梧棲鳳去無迹矯首碧雲端一語三歎息

頻酌淮河水

有客游濠梁頻酌淮河水東南水多鹹不如此水美春
風吹綠波鬱鬱中原氣莫向北岸汲中有英雄淚

刈麥行

腰鎌上隴刈黃雲東家西家麥滿門前村寡婦拾滯穗
饘粥有餘炊餅餌我聞淮南麥最多麥田今歲屯干戈
飽飯不知征戰苦生長此方真樂土

元宵雨

窮人不謀歡元夜如常時晴雨均寂寞蚤與一睡期朱
門架燈火歌舞臨酒池酒闌歡不足九街恣游嬉前呵
驚市人簫鼓逐後隨片雲頭上黑翻得失意歸

鄂渚張唐卿周嘉仲送別

武昌江頭人送別楊柳秋來不堪折漢陽門外望南樓
昨日不知今日愁英雄握手新相識人情正好成南北
酒闌人散最闌情一雁西飛楚天碧

詰燕

去年汝來巢我屋梁間汙泥高一尺啄腥拋穢不汝厭
生長羣雛我護惜家貧惠愛不及人自謂于汝獨有力
不望汝如靈蛇銜寶珠雀獻金環來報德春風期汝一

相顧對語茅簷慰岑寂如何今年來于我絕蹤跡一貪
簾幙畫堂間便視吾廬為棄物

寄趙鼎臣

學如劉子政不使校書天祿閣文如李太白不使待詔
金鑾殿倚樓終日看廬山贏得虛名聞九縣才忌太高
心忌太清平平穩穩為公為卿驥可羈乃歸帝閑麟
鳳莫測為瑞人間人間為瑞徒能好驥驥可羈終遠到
歲寒心事幾人知手把梅花供一笑

阿奇晬日

窮居少生涯養子如種穀寸苗方在手想像秋禾熟吾
兒天所惠骨相頗豐碩娟娟懷抱中一歲至周日願汝
無災害長大庶可必十歲聰明開二十早奮發冒蟠三
萬卷手握五色筆策勲文字場致君以儒術不然學孫
吳從橫萬人敵為國取中原闢地去冥北他年汝成就
料我頭已白光華照老眼甘旨不可缺為子必純孝為
臣必正直以我期望心一日必一祝勿謂癡小兒茫然

無知識胎教尚有聞斯言豈無益

松江舟中四首荷葉浦時有不測末句故及之

夜聽楓橋鐘曉汲松江水客行信息少住亦可喜且
食鰕魚肥莫問鱸魚美

垂虹五百步太湖三萬頃除却岳陽樓天下無此景范
蠡挾西施功名付煙艇

秋風吹客衣歸興浩難寫寒林噪晚鴉紅日墮平野篙
師解人意棹酒旗下

扁舟乃官差舟子吾語汝汝為我作勞吾亦不汝負好
向上塘行莫過荷葉浦

漁父詞二首

漁父飲不須錢柳枝斜貫錦鱗鮮換酒却歸船
漁父醉釣竿間柳下呼兒牢繫船高眠風月天

觀陸士龍作顧彥先婦答夫二首有感次韻

北風吹歲暮空閨獨棲止夙興淚盈掬夕息夢十里妾
生胡不辰失身從蕩子嚼蘖苦我心餐冰噤我齒離異

奚足悲險澀可勝紀寄書西飛雁反復話終始

鼠璞竊美名冠玉假外觀良人誇意氣下妾愁歲晏念
君始行邁雪嶺梅初祭春風桃已紅光陰等飛彈相思
果如何金環寬玉腕昔為連理枝今作搏沙散惜哉牛
與女脉脉阻河漢特棲良獨難守堅祇自讚雙劍幾時
合寄聲問華煥勿聽五羊歌富貴忘貧賤

栗齋輩仲至以元結文集為贈

尋常被酒時歸則急投枕為愛次山文今夜醉忘寢偉

哉浯溪碑千載氣凜凜春陵賊退篇少陵猶斂衽文章
自一家其意則古甚太羹遺五味純素薄文錦聳牙不
同俗斯人異所稟君君望堯舜人人欲倉廩古道不可
行時對窪樽飲

杜甫祠

嗚呼杜少陵醉卧春江漲文章萬丈光不隨枯骨葬平
生稷契心致君堯舜上時兮弗我與屹然抱微尚干戈
奔走蹤道路饑寒狀艸中辨君臣筆端咏將相高吟比

興體力救風雅喪如史數千篇才氣一何壯到今五百
年如公尚無恙麒麟守高阡貂蟬八畫像一死不幾時
聲迹兩塵芥何如耒陽江頭三尺荒州墳名如日月光
天壤

琵琶亭

潯陽江頭秋月明黃蘆葉底秋風聲銀龍行酒送歸客
大夫不為兒女情隔船琵琶自愁思何預江州司馬事
為渠感激作歌行一篇六百一十字白樂天白樂天平

生多為達者語到此胡為不釋然弗堪謫宦便歸去廬
山故接柴桑路不尋黃菊伴淵明忍泣青衫對商婦

送李來賓

君作來賓宰聽我說來賓蠻俗無王化當為行化人有
民無租賦租賦出商旅逐利遭重征商旅亦良苦能放
一分寬可減十分怨不愛資囊橐但愛了支遣民窮賴
撫摩官貧俸不多但得百姓安俸薄其奈何勿謂朝廷
遠官職易遷轉律身貴廉勤御事要明斷自縣辟為州

指日為太守須知早歸來瘴鄉不可久

題姚雪蓬使君所藏蘇野塘畫

高者為山坳者為壑為煙為雲渺漠漠水鳥樹林人
家聚落騎者何之舟者未泊三尺紙上萬象交錯天機
自然神驚鬼愕嗚呼此吾之故人野塘蘇元龍之墨迹
中有石屏老淚痕又為野塘添一筆

章泉二老歌

在昔商山傳四皓又聞香山圖九老異鄉異姓適同時

爭如章泉一家兄弟登期頤章泉之上兩山下有地可
宮田可稼伯也仲也蚤休官季也相約歸林泉名動京
師耕谷口山中有詩天下傳一生得閒兼得壽皓首龐
眉世稀有竹隱先生八十三定庵居士七十九客從遠
方來亦是六十叟手把一枝梅奉勸兩翁酒問翁何以
致遐齡請翁細說吾細聽不燒丹不學仙五行有長數
天所稟賦焉人生一氣統四體衆人斷喪吾能全要知
養心無他術日多喫飯夜獨眠承翁見教謝翁去兩翁

慙慙留我住是夜醉眠苔竹軒
夢見山靈向我言翁之所說
皆不然兩翁盛德合乎天天與
遐齡五百年

毗陵呈王君保使君二首

姑蘇道士天酒星醉筆寫出雙龍形
墨蹟從橫奪造化
蜿蜒滿壁令人驚一龍翻身出雲表
口吞八極滄溟小
手弄寶珠珠欲飛握入掌中拳五爪
一龍排山山為開
頭角與石爭崔嵬波濤怒起接雲氣
不向九霄行雨來
萬物焦枯天作旱兩雄壁隱寧非懶
真龍不用只畫圖

猛拍闌干寄三歎

右天慶觀畫龍自題姑蘇羽士李懷仁醉筆

何人筆端有許力捲來一片瀟湘碧摩挲老眼看不真
怪是層波湧虛壁天慶觀中雙黑龍物色雖殊妙處同
能將此水畜彼龍方知畫手有神通龍兮水兮終會遇
天下蒼生待霖雨

右太平寺畫水

南嶽

南雲縹緲連蒼穹七十二峯朝祝融
凌空棟宇赤帝宅
脩廊翼翼生寒風
朝家遣使嚴祀典
御香當殿開宸封
願福四海扶九重
干戈永息年屢豐
五嶽今惟見南嶽
北望乾坤雙淚落

玉華洞

憶昨游桂林巖洞甲天下奇奇怪怪生妙不可模寫
玉華東西巖具體而微者神工巧穿鑿石壁生孔罅
玲瓏透風月宜冬復宜夏中有補陀仙坐斷此蕭灑
空山茅

葦區無地可稅駕舉目忽此逢心駭見希詫題詩媿未
能斯人亦無暇

祝二巖

僕本山野人漁樵共居處小年學父詩用心亦良苦搜
索空虛腹綴緝艱辛語餬口走四方白頭無伴侶前年
得巖粲今年得巖羽我自得二巖牛鐸諧鐘呂粲也苦
吟身束之以箚組遍參百家體終乃師杜甫羽也天姿
高不肯事科舉風雅與騷些歷歷在肺腑持論傷太高

金少... 卷二百七十三
與世或齟齬長歌激古風自立一門戶二巖我所敬二
巖亦我與我老歸故山殘年能幾許平生五百篇無人
為之主零落天地間未必似塵土再拜祝二巖為我收
拾取

懷家三首

白髮出門來三見梅花謝客路有歲年歸心無晝夜
強言不思家對人作意氣惟有布被頭見我思家淚
三年寄百書幾書到我屋昨夜夢中歸及見老妻哭

--	--	--	--	--	--	--	--	--	--

Handwritten text in the left margin, possibly a page number or title.

十

欽定四庫全書

兩宋名賢小集
卷二百七十三

兩宋名賢小集卷二百七十三